

Frá ráðgjafarnefnd gæðaráðs íslenskra háskóla

Endurskoðun reglna um eftirlit með gæðum kennslu og rannsókna í háskólum nr. 321/2009.

Mál nr. S-126/2018.

Ráðgjafarnefnd gæðaráðs íslenskra háskóla fagnar þeirri breytingu sem boðuð er á reglum nr. 321/2009 um eftirlit með gæðum kennslu og rannsókna við íslenska háskóla. Það er álit nefndarinnar að það sé til bóta að verið sé að færa regluverkið nær þeim veruleika sem nú er við lýði hvað varðar gæðaeftirlit með háskólum og starfsemi þeirra. Eftirfarandi eru athugasemdir nefndarinnar við endurskoðaðar reglur um eftirlit með gæðum kennslu og rannsókna í háskólum nr. 321/2009.

1. Gæðaráði íslenskra háskóla, sem sett var á laggirnar af Mennta- og menningarmálaráðruneytinu 2010, er nú fundin viðeigandi lagastoð í viðkomandi reglugerð. Hins vegar má benda á að ráðgjafarnefnd gæðaráðs íslenskra háskóla hefur starfað jafnlengi gæðaráðinu og var einnig komið á fót af ráðuneytinu. Hlutverk nefndarinnar er enda skilgreint í 8. kafla 2. útg. handbókar gæðaráðsins frá 2017. Ráðgjafarnefndin gegnir mikilvægu hlutverki sem tengiliður gæðaráðs við íslenskt háskólasamfélag ásamt því að hafa haft umsjón með kynningu þessa málaflokks og annast námskeið, ráðstefnur og almenna uppfræðslu um þessi málefni. Ráðgjafarnefnd vill því koma þeirri ábendingu til stjórnvalda að æskilegt sé að binda hlutverk nefndarinnar í viðkomandi regluverk til að tryggja framgang málaflokksins í heild sinni og að sá mikilvægi hlekkur í gæðakeðjunni verði tryggður til frambúðar.
2. Í 3. gr. er kveðið á um að einn fulltrúi stúdenta sé skipaður skv. tilnefningu Landssamtaka íslenskra stúdenta (LÍS). Samkvæmt því skipulagi sem nú er við lýði er einn fulltrúi stúdenta skipaður í ráðið sem fullgildur meðlimur en annar sem áheyrnarfulltrúi. Ekki er ljóst af texta tillögunnar hvað verður um áheyrnarfulltrúa stúdenta með breyttu fyrirkomulagi. Þá er ákjósanlegra að skipunartími fulltrúa stúdenta sé til þriggja ára að hámarki til að tryggja að sá fulltrúi sé í raun í forsvari fyrir stúdenta á skipunartímanum. Æskilegt væri að gera betur grein fyrir þessu í texta nýrrar reglugerðar.
3. Í lok [3.gr.](#) er kveðið á um að framkvæmdastjóri gæðaráðs skuli hafa háskólamenntun og búa yfir sérþekkingu á sviði gæðamála háskóla. Æskilegt væri að nánar yrði skilgreint hvað felist í þessari sérþekkingu og hvernig hún skuli metin.